

太上洞玄靈寶業報因緣經卷之四 六

奉戒品第六

大慈大悲普濟真人以業報因緣請問

太上道君爾時道君告普濟曰我從無始世界已來常在人間教化說法度脫眾生使過

去未來十方三界人天凡聖普使聞知等會

無為入真常道不生不滅無去無來常住湛

然圓通靜室登此界者皆須持戒始自發心

終於極果懺悔受戒誦念持齋行道至誠發

弘誓願讚歎布施滋潤眾生救護一切廣建

功德感應諸天福報生神攝因生化本迹機

會證實相行敘教流通廣統真應方始會道

念念不捨滅心忘心皆須持戒持戒不犯諸

天降臨眾聖敬仰群魔讚唱各隨功業列名

上官我故隨其分力廣說戒門多少不同上

下有異任汝眾生相機所受三戒五戒六戒

七戒八戒九戒十戒十二可從戒十四持身

戒二十四戒二十七戒三十六戒乃至洞玄

下品四十中品六上品八十一百八十八上

清三百觀身洞神七百二十戒各有次第導

引群迷能有受持皆獲福利滅罪無窮並散

在三洞諸經流行已久眾生暗昧不能得聞

今止為汝說無上十戒作人天福業生死善

緣傳示當來徧令護持降福消禍不可思議

第一戒者不得殺生及懷殺想常行慈悲濟

度一切觀諸眾生當如己想

第二戒者不得偷盜及懷盜想常行退讓不

受非義觀諸資財如己物想

第三戒者不得邪淫及懷姙想常行貞潔獨

處幽棲觀諸男女如骨肉想

第四戒者不得慳貪及懷貪想常行布施廣

濟貧窮平等一心無彼我想

第五戒者不得瞋怒及懷怒想常行歡喜和

睦寬親觀諸眾生如赤子想

第六戒者不得愚癡及懷癡想常行智慧勸

誘愚迷觀諸眾生如手足想

第七戒者不得綺言及懷綺想常行忠正內

外純和觀諸經教生念誦想

第八戒者不得妄語及懷妄想常行信實隱

顯無欺觀諸人民無虛誑想

第九戒者不得惡口罵詈及惡口想常行正

念不起毒心觀彼毒蛇自取害想

第十戒者不得兩舌開亂及兩舌想恒行端

直不起愛憎觀諸彼我無向背想

道君曰此十戒者是眾生城郭依棲屋宅能

守持者有五童玉女金剛神王將軍力士各

二十四人侍衛左右消災度厄保命延年具

聖敬仰諸天歡悅刀兵水火虎狼蟲蛇疾病

牢獄鬼賊邪精飢寒惱難一切眾禍永不干

身求男得男求女得女富貴壽樂所願遂心

智慧聰明形容端正人中第一不可思議過

去受生天宮淨土華臺寶殿衣食無為雲蓋

龍車逍遙自在常聞經法侍奉

天尊展轉受身會正真道持此戒者如彼寶

劍能斷一切如彼法舟能度一切如彼猛火

能燒一切如彼淨水能洗一切自三清已下

乃至十方上聖真仙莫不皆由持此戒也戒

者防罪止惡檢束身心降伏妖魔感動靈聖

道君曰昔有五百男子於純和國空明山中

修道二十一年共持此戒悉悟無為吾遣達

相真人度入無相天中今並得為金光仙人
更學大乘漸階真位又栖浮國空積山中有
三萬六千女子同心學道一百年中不聞此
經戒被大魔精中害悉入無明水中流浪沉
沒不能得出吾遣度脫真人往彼救技授與
此經令漸開悟移在觀山正持十戒已得六
百萬年日夜翹勤專一不二靈芝神草甘露
玉池自生其處充給飲食稍稍明了自會至
真善濟問曰未審持此戒者須從師受止讀
經文又衆生氣力優劣不同或卒世奉行或
一時便止未審其意如何伏願
天尊賜垂分解
道君曰若有善男子善女人能發道心詣師
請受終身奉行過去見存獲福無量若復抄
寫依經誦燒香供養如法修行最為第一
不可思議若值講說敷妙旨廣為人民能
詣師傳歸心奉受如戒修行獲福巍巍又復
詣師請受不得修行或就本家奉持暫時即
替一時蒙惠福亦不輕何以故猶如甘雨一
霖受者皆潤隨其稟澤悉得滋榮戒得所睹

莫不咸賴

道君曰若道士女冠為國主人王宰輔人民
土地山林三塗五苦一切衆生所在發心建
百高座廣召同侶講說此經三日七日九日
十日乃至百日不限時節燒香行道禮懺啓
願敬華燃燈普勸衆生令持齋戒使悉知聞
願得天下太平兆民安樂福祚堂堂若復有
人能為國王帝主土地人民抄寫此經百部
千部乃至萬部無量數部所在流通教化一
切悉得受持得福無量不可思議

道君曰若道士女冠為諸男女度受戒時皆
當先行信籌籌長一尺二寸竹木之屬隨便
制之付此籌後方當授戒行此籌者四種因
緣一者令諸男女生回向心二者預審本心
必令堅固三者先示信緣生飢渴想四者奉
戒弟子通誠願相開度所以謂為信籌籌者
一則自計己身善惡多少二則請諸真聖筭
命增加示此法相令戒專一是故度戒先授
此信籌

持齋品第七

道君曰衆生無始受身以來慳貪嗜欲飲食
酒肉嗜嚼無厭長此肌膚養其膿血致生病
惱彌益罪根生老病死暑濕風寒痛痺酸疼
惡風毒氣入身染體百病來侵念念無常晝
夜不住受生稟賦各各不同日夜循環萬萬
生死或處胞胎如成膿血隨即化消或居母
腹不得出生便復破壞雖作分解母子暫殊
即便死亡不可稱計或一歲兩歲乃至百歲
念念解張衰耗豈住頭痛壯熱萬惱相侵一
生之中無少安樂者良由廣食穢濁積滿身
中酒肉膻肌蒸然臟腑惡風毒氣吹扇形骸
金玉化消身形詎久吾不飲不食抱道自然
變化無方長生不死常說經教開度衆生凡
夫愚迷不能信用我常憂念慈痛在茲故設
齋法令滅病苦吾昔就

元始御前受三十六部經文齋法精微濟度
群品行之人間具有成法凡夫無知謂為虛
誕如三清衆聖久證道真恒悉奉齋勤行不
怠況汝輩乎若上士勤行長齋清室誦經燒
香中不懈怠或存或亡隨其愚智制法不同

善巧方便開度衆生六齋十直八節三元甲子本命三會庚申諸雜救護微妙難思皆是元始引接下凡吾常勸教善使修行普濟開曰未審建齋功德輕重復有何神監臨為復直爾斷食復有威儀又至道圓通徧諸有法當隨分力恣任能行立六齋等法也愚所未了願垂教誨

道君答曰功德輕重諸天降臨威儀軌則六齋等別並備靈寶諸經今粗說之汝宜諦聽齋者二種不同一則極道二則濟度極道者為發心學道從初至終念念持齋心心不退復有二門一謂忘心二謂滅心忘心者始終運意行坐忘形寂若死灰同於槁木滅想滅念惟一而已滅心者隨念隨忘神行不系歸心於寂直至道場濟度者謂回念至道翹想玄真願福降無窮災消永兆又有二種隨力修行一者虔心二者捨財虔心者惟登一心丹誠十極燒香禮拜惟求於道捨財者市諸香油八珍百味管饌俱具屈請道士及以凡品歸心啓告委命至真內泯六塵外齊萬景

冥心靜慮歸誠於道克成勝果未契無為救濟存亡拔度災苦隨其分力福降不差功德重輕各在時矣建齋之日諸天上聖真仙靈人玉童玉女三界五帝一切威靈建節持幢執符把籙飛空步虛燒香散華觀聽法音錄罪福名書詣天金格玉字受福無窮所以別立月日者至是之辰吾遣三界十方善惡神靈按行人間矣正月青帝九氣功曹將軍九億萬衆建節持幢與神仙兵馬玉童玉女同下人間條錄罪福三月黃帝一氣天罡將軍五億萬衆執符把錄與神仙兵馬玉童玉女同下人間糾察罪福五月赤帝三氣勝先將軍三億萬衆飛空步虛與天仙兵馬仙童玉女同下人間按行罪福七月白帝七氣傳送將軍七億萬衆瓊輪羽蓋與天丁力士同下人間書其罪福九月上元一氣河魁將軍五億萬衆揮幢執節與功曹使者玉童玉女同下人間抄其善惡十一月黑帝五氣神后將軍五億萬衆燒香散華與左右龍虎君同下人間糾正罪福正月十五日為上元十天

靈官神仙兵馬與無鞅數衆上聖高尊妙行真人同下人間考定罪福七月十五日為中元九地靈官神仙兵馬無鞅數衆名山洞府神仙兵馬同下人間校錄罪福十月十五日為下元九江水帝十二河源溪谷大神水府靈官同下人間校定罪福立春日元始遣度仙上聖天尊將始青天君神仙兵馬無鞅數衆教化人間開度衆生春分日元始遣玉寶皇上天尊將青靈始天帝君神仙兵馬無鞅數衆教化人間開度衆生立夏日元始遣好生度命天尊將始丹天君神仙兵馬無量聖衆教化人間開度群品夏至日元始遣玄真萬福天尊將丹靈真天帝君神仙兵馬無量聖衆教化人間開度衆生立秋日元始遣太靈虛皇天尊將始素天君神仙兵馬無量聖衆教化人間開度群品秋分日元始遣太妙至極天尊將皓靈皇天帝君神仙兵馬無量數衆教化人間開度群品立冬日元始遣無量太華天尊將始玄天君神仙兵馬無量數衆教化人間開度群品冬至日元始遣玄上

玉宸天尊將五靈玄老帝君神仙兵馬無鞅
數眾教化人間開度群品皆從仙童玉女南
斗北斗四司五帝建符執節燒香散華龍輿
鳳駕徧滿虛空或長或短或雲或雨或風或
靈或鳥或獸或青或黃種種變化按行人間
條錄罪福觀察衆生又每月一日元始西北
天與北斗及傳言使者下八日元始北方天
與北斗司殺鬼及赤車使者下十四日元始
東北天與太一使者及典司使者下十五日
元始東方天與天帝及天地水三官并監司
使者下十八日元始東南天與天一及賊曹
使者下二十三元始南方天與太一八神
使者及符章侍從下二十四日元始西南天
與北辰及守宅三將軍下二十八日元始西
方天與下太一及天公使者下二十九日元
始下元天與中太一及諸官將軍下三十日
元始上元天與上太一及天帝使者下皆與
諸天眾聖至真尊神仙童玉女四司五帝五
斗監司建節持幢步虛請經檢行男女所積
善惡罪福因緣又甲子日太一中臺天使下

庚申日太玄上宮制民三尸下又正月一日
獻壽七日迎祥二月八日芳春三月三日蕩
邪四月八日啓夏五月五日續命六月六日
清暑七月七日迎秋八月一日逐邪九月九
日延算十月一日成福十一月十五日啓福
十二月初五日百福本命日祈年三會日建
功凡此諸齋日若帝王國主妃后大臣公侯
宰輔道士女官人民兆庶或自為人燒香行
道誦經禮謝講說此經奏名白簡投告山川
五嶽四瀆山洞靈司吾帝遣諸真人神仙玉
女侍巾玉童香官使者檢錄名字著神仙玉
曆長生簿中令厄難消除衆苦清淨享無
窮一日持齋減身中五十種罪得五日餘糧
二日減身中一百種罪得十日餘糧三日減
身中一百五十種罪得一十五日餘糧五日
已上減身中五百種罪得千日餘糧百日身
中萬罪皆滅行廚來至玉女扶迎衣食自然
千日三界侍衛五帝扶持門戶昌熾子孫興
隆天人來格吉慶日臻過去得生天王之門
或聰明智慧相好端嚴年命長遠歡樂自然

道君曰吾昔於清妙國中說法教化天人時
有男女八萬七千人俱來詣座同發善心結
大弘誓爲帝主國王后妃大臣公侯宰輔人
民土地一切衆生常持六齋十直三元八節
甲子庚申諸雜齋等及建百座高臺若請道
士講說此經十二年中勤誠不退感徹諸天
吾遣左玄真人同授靈藥各得長生今在善
積山中並證仙道其威儀軌則各如三洞法
矣普濟稽首問曰未審齋法以何時也
道君答曰天地運度晝夜相推十二時間氣
有生死盛衰變化善惡吉凶人鬼不同罪福
各別陰陽利害自有所宜今具說之子宜諦
受夜半是諸天人食世人食之增筭九十除
八十一病地官敬仰鷄鳴時是諸天官食世
人食之增筭一百除病九十地官司迎平旦
時是諸天輔食世人食之增筭一百二十除
病一百地官畏之日出時是諸天王食世人
食之增筭一百四十除病一百二十地官送
迎辰時是諸天帝釋食世人食之增筭一百
八十除病一百六十地官侍門禺中是諸天

眞聖食世人食之增算四十除四百四病諸
 天下臨玉女散華金童揚煙三界五帝日月
 星辰神仙兵馬金剛力士一時齊到止善輟
 惡名聞上清萬天歡悅一切獲福宜以此時
 致齋也日中是諸天魔王食世人食之減算
 九十生八十一病地官察身日昧時是諸地
 魔王食世人食之減算一百生病九十一地
 官宮門時是人間諸鬼神食世人食之減
 算一百二十生病一百地官生罪惡鬼殺身
 黃昏時是地下冥王鬼神食世人食之減算
 一百八十生病二百眾害傷身人定時是餓
 鬼畜生鄩都鬼神食世人食之減算五千生
 四百四病萬害加身故鬼物邪精乘其飯食
 入人腹中能生百病及諸衆苦一切厄難奪
 人算命不得神仙長生不死若諸男女能依
 我法各知所說凡食之時皆須先出諸食種
 種於前一則獻仙聖二飴地祇三與鬼神四
 及衆生起此四想是大慈惠免諸凶惡鬼氣
 不侵散施鳥獸遍及蟲魚悉令飽滿獲福無
 量生死受恩普濟又曰受食有向次第

道君答曰先須盥漱端身燒香行道懺悔禮
 拜發願回向陳啓事竟然後受食閉目存想
 身中諸神與三一同食食之時不得他人輒
 動手有穢觸安徐咬嚼與氣俱進皆當手捧
 清淨巾器勿教凡穢言笑喧聒是名法食始
 曰清齋能依是言諸天降駕萬聖齊臨衆算
 稱善玉女散華生死蒙恩得福無量

太上洞玄靈寶業報因緣經卷之四

太上洞玄靈寶業報因緣經卷之五 五

誦念品第八

大慈大悲普濟真人以業報因緣請問
 太上道君爾時道君告普濟曰昔勝喜天王
 召道士女官三萬六千人妙化天王召道士
 女官三千二百人妙德天王召道士女官一
 千五百人清淨天王召道士女官一萬八千
 人靈和天王召道士女官五百六十人淨和
 天王召道士女官七萬二千人此六天王各
 同時於其正殿建立道場懸諸寶蓋燒百和
 寶香裝百寶座設百味飲食散萬種名華陳
 綺綾羅諸帳布帛一百日中誦念此經依時
 行道恭敬禮拜持齋燃燈晝夜不懈王與皇
 后并諸王子宰輔大臣日夜燒香散華行道
 布施懺悔國中男女臣人百官闕王建此福
 田各自發心捨其居宅所有財物市諸香油
 華果名衣上服種種法具來詣國門以用布
 施供養道士願王國土安寧人民快樂先亡
 者離苦生天道遠自在填滿道路王不禁制